

Naqqiut  
(taarserpaa akissuteqaat 12. majimeersoq 2015)

**Qanoq iliorluta meeqqat pitsaanerusumik angerlarsimaffiup avataanut inissitagut nammineersinnaanissaannut ikiorsersinnaanerivut pillugu apeqqutaat aallaavigalugu oqallisissiaq**

(Inatsisartunut ilaasorta Agathe Fontain, Inuit Ataqtigiit)

**Akissuteqaat**

(Ilaqutariinnermut, Naligiissitaanermut Isumaginninnermullu Naalakkersuisoq)

Qujanaq sammisamut tassunga pingaarutilerujussuarmut naleqquttumullu siunnersuummut.

Angerlarsimaffiup avataanut inissiinnermut pissutaasut assigiinngitsorujussuusinnaapput. Meeqqat inuusuttullu taakku amerlanertigut ilaqutariinnit nukissaqarpiannngitsuneersarput, persuttaaffiusunerlutik, kinguaassiutitigut innarlerneqarnikuusimasinnaaput allatigulluunniit sumiginnaanikkut atugarliorsimasuullutik. Meeqqat inissineqarsimasut sanngiitsuusarput, inuuniarnikkut ilungersuasarlutik, inuunermillu sinnerani ajoqusiisumik. Meeqqat inuusuttullu taakku ikiorserlugillu tapersersorneqassapput.

Ulloq unnuarlu paaqqinniffiit annertoorujussuarmik suliaqarput, meeqqat inuusuttullu sanngiitsumik inuuneqalersimasut, isumalimmik inuuneqalernissaannut, toqqissisimasumik nammineersinnaalernissaminillu inuuneqalernissaannut ikiorniartugit. Ulloq unnuarlu paaqqinniffinni inissineqartut tamarmik, sulisut piginnaasat naapertorlugit, sulisullu inunnik isumaginninnikkut ilisimasatik naapertorlugit sullissisarput. Sullinneqarnermi iliuitsit assigiinngillat, apeqqutaasarput pingaartinneqarlutillu meeqqap inuusuttulluunniit pisariaqartitsinerat inissisimanerlu tunngaviusarluni, qanutut sullinneqarnissaat. Taamaalilluni sullissineq najugaqartumut tulluarsarneqarlunilu naleqqussarneqartarpoq. Inissinissaq sioqqullugu nalaanilu meeraq inuusuttorluunniit inuttut tarnikkullu ineriartorneranut naleqqiullugu ataavartumik suliaqarnissaq annertuumik eqqumaffigineqartarpoq malinnaaffigineqartarpoq. Aammattaq inuusuttut namminiilersinnaanissaat, suliffeqarnissamut soqqutiginnilernissaat kiisalu inuiaqatigiinnut akuulernissaat annertuumik eqqumaffigineqartarput.

Ilaatigut ilaqutariinni imigassamik ajornartorsiuteqartarput. Anaanaasoq naartunermini imigassartortarsimappat meeraq inunngornermini imigassamik peqquteqartumik innarluuteqalersinnaavoq, assersuuitit; meeraq ilikkarniarnermigut ajornakusoortitiner, nalinginnaasumik ineriartornissaralua kigaalluni, oqaatsitigut ajornartorsiuteqarneq ilaatigullu sianissutsikkut innarleqqaneq qaratsamigut annertuumik akornuseqqanerut pissutaalluni. Innarluutit taakku inuuneq naallugu atugassarititaasarput, anaanaasoq naartunerup nalaani imerajuttuusimaguni, taamaattunik naartup ineriartornera innarlertarpa. Imigassamik peqquteqartumik innarluuteqalernermi ajorunnaarsitsisumik katsorsaatissaqanngilaq, taamaattumillu pingaaruteqarpoq meeqqap pitsaanerpaamik iluaqutissiisummik siusissukkut immikkut ikiorneqarnissaat, meeqqap ineriartorsinnaaffii tapersersorniaraani.

Eqqaaneqassaarli siusissukkut iliuseqarneq amerlanertigut inassutigiuminaraluartoq ikiorneqarnissamik pisariaqartitsineq ilaatigut aatsaat kingusinnerusukkut saqqummertarluni,

assersuutigalugu inersimasuni meeraanermi kinguaassiutigut innarlerneqarsimanermi kingunerlutitsinerit. Kingunerlutitsinerit pissutigalugit inuuniarnikkut tarnikkullu ajornartorsiornikkut ulluinnarni inuunerup ingerlannissaa ataasiakkaanut sapernarsisinnaasarpoq. Kingunerlutitsisut pitsaanerusumik inuuneqalernissaannut ikiorniarlugit aammalu suliffeqalernissaminnut piareersimanerulernissat anguniarlugu tarnip pissusaanik ilisimasalinnik angalasartunik Naalackersuisut september 2013-mili pilersitsipput, katsorsaaneq pisariaqartinneqartoq neqeroortigalugu, taakkulu nunatsinni sulianik ingerlatsipput. Peqatigisaanillu angajoraat kinguaassiutigut innarlerneqarsimanermikkut kingunerlutitsisut meeraasa kinguaassiutigut innarlerneqannginnissaanut imaluunniit allatigut sumiginnagaannginnissaanut pinaveersaartitsinermik suliniummi ilaavoq.

Pinaveersaartitsinissaq pingaaruteqarluinnarpoq, tassani suliniut alla – ilaqutariinnik isumasiueqatigiissitsineq – ilaatigut tassani peqataalluni. Tassani periutsimi ilaqutariit tamarmik nukissaqarnerat tunngavigineqarpoq. Meeraq / inuusuttoq, ilaqutariit attaveqarfiillu ilanngutsinnerisigut meeqqap / inuusuttup ajornartorsiutaanut naleqqiullugu akisussaaffeqarnermut ilaqutariit iluminni kivitseqatigiinnissaat najoqqutaralugu tapersorsorneqartarput. Taamaalilluni -ilaqutariinnik isumasiueqatigiissitsineq-inissiinnginnissamut pitsaaliuinermit peqataasinnaavoq, aammatarlu meeqqap / inuusuttup pisumi pineqartumut sapinngisamik annerpaamik isumassorneqarnera qulakkeerneqarluni.

Naalackersuisut ilisimavaat kommunini sulianik suliarinnittorpassuit suliassanik sulinermilu annertuumik tatisimaneqartut. Tassani “Qitiusumik Siunnersuisarfik” angalasartussat Naalackersuisut pilersitsinialerput. Angalasartussat suliassarissavaat kommunini sulianik suliarinnittut ikorfartussallugit ilaatigut suliassani pisariusuni sulianik suliarinninnermi, sulianik suliarinnittut pikkorissarnermik, suleriaatsinik, sakkunik inerisaanerit kiisalu suliart inatsisitigut piumasaqaatinik naammassinnissimanissaq qulakkeernissaanik pikkorissaallutik.

Inuusuttut inissineqarsimasut amerlasuut 18-nik ukioqalereernermit kingornatigut tapersorsorneqarnissamik pisariaqartittarpat, taamaattumik pingaaruteqarpoq qulakkiissallugu inuusuttoq nammineersinnaasut inersimasutullu inuuneqalernissamut ajunngitsumik ikaarsaartoqarnissaa aqutissiorneqartarnissaanik tapersorsorneqartarnissat. Taamaattumik piumasaqaataavoq inuusuttoq 18-nik ukioqalernissaa qaammatinik arfinilinnik sioqqullugu ingerlariaqqinnissaa pillugu pilersaarusiortoqartassasoq. Aammattaaq suliniuteqareernermit malitseqartitsisoqassanersoq pillugu aalajangiisoqartassalluni. Tamanna pisarpoq inuusuttup oqaloqatigineratigut. Assersuutigalugu inuusuttoq sungiussiartuaartitsinermit neqeroortigineqarsinnaavoq, tassani suliartigut ilinniagaqarsimasumit tapersorsorneqarluni inersimasut inuuneq qanoq ingerlassinnaanerlugu. Suliniuteqareernermit malitseqartitsineq kommunip suliassaraa.

Oqaatigineqassaaq innuttaasut ataasiakkaat inissisimanerat immikkuullarittarmat. Taamaattumik qanoq ilinerani ikiuisoqassanersoq kiisalu ikiuinermit tapersorsuinermillu qanoq ittumik pisariaqartitsisoqarnersoq ataasiakkaanut tunngasuulluni. Tassunga ilanngutissaaq innuttaasut ilaat inuunertik naallugu ikiorserneqarnissamik tapersorsorneqarnissamillu pisariaqartitsisarmata, qanoq siusitsigisumik imaluunniit qanoq sakkortutigisumik akuliuttoqarnera apeqqutaatinnagu.

Inatsisartuni ajunngitsumik kinguneqartumillu oqallinnissamut Naalackersuisut qilanaarput.